



Broj: 01/1-02-3545/17  
Breza, 31.01.2018. godine

## ZAPISNIK

**Sa TRINAESTEREDOVNE SJEDNICE Općinskog vijeća održane dana 27.12.2017. godine sa početkom u 16,30sati u prostorijama Općine Breza-Sala Općinskog vijeća.**

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 20 vijećnika.

Na prozivci nije bio prisutan vijećnik Bajrić Fetah.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici Općinskog načelnika: Meliha Beširević, Smajila Omerhodžić, Salih Hasanspahić, Herco Huso, općinski pravobranilac Dženana Telalović, savjetnici općinskog načelnika Mustafić Eldin i Džambić Mirza, predsjednik i članovi Odbora za provedbu Etičkog kodeksa, predstavnici i članovi političkih stranaka, predstavnik IPSA instituta i predstavnici medija.

Predsjedavajući Općinskog vijeća Jusić Vedad upoznao je vijećnike da su održana dva sastanka predsjednika klubova parlamentarnih stranaka, te da se Zapisnica nalaze u materijalima, kao i mišljenja Komisije za Statut i propise i Komisija za Budžet i finansije, a dostavljena su i dva vijećnička pitanja. Predsjedavajući Općinskog vijeća također je upoznao vijećnike da će se 11.01.2018. godine održati obuka vijećnika na temu „Upravljanje lokalnim razvojem“ koji će se održati u Sali Općinskog vijeća.

Zatim se prešlo na razmatranje Zapisnika sa 12. redovne sjednice Općinskog vijeća Breza. Primjedbi na zapisnik nije bilo, te je isti nakon glasanja usvojen jednoglasno sa 20 glasova ZA, bez protiv i suzdržanih glasova.

Komentara na odgovore po vijećničkim pitanjima nije bilo, pa se prešlo na postavljanje novih vijećničkih pitanja.

Predsjednik kluba SDA Mirza Ahmedspahić u ime kluba postavio je dva vijećnička pitanja koja se odnose na aktuelne sudske sporove protiv bivšeg načelnika Halila Tuzlića. Da li su spomenuti procesi okončani, na koji način, odnosno šta je sve poduzeto u prethodnom periodu od trenutka kad je ovo pitanje postavljeno prvi put.

Drugo pitanje je: „

„Da li je Općinski načelnik obavezan poštovati Oduke i Zaključke Općinskog vijeća i zna li da nepoštivanje istih prouzrokuje određene sankcije. Zna li g-din načelnik da nepoštivanje Odluka Općinskog vijeća znači i nepoštivanje svih građana Breze. Pitanje se odnosi na Revizorski izvještaj općine Breza za 2016. godinu.

Vijećnik Kadrić Memsud pokrenuo je inicijativu da Općinski načelnik predloži određen broj uposlenika općine koji će prisustvovati obuci vijećnika radi sticanja znanja.

Postavio je pitanje koliko općina ima urađenih projekata koji nisu pokrenuti i koliko projekata je urađeno.

Vijećnik Bašić Mirnes ispred SDA zatražio je informaciju

-Od Općinskog načelnika i službe za finansije

„ Koliko ih je i koji su to službenici općinskog organa i zbog čega su ostvarili dodatna sredstva na ime stimulacije ili ugovora o djelu u 2017. godini. Koliko ih je i koji su to službenici Općinskog organa i zbog čega su kažnjeni smanjenjem plate u 2017. godini.

Takođe je zatražio da nas izvijeste o kadrovskim promjenama, procedurama i razlozima zbog kojih je došlo do istog u Domu zdravlja Breza, obzirom da je Općinsko vijeće osnivač Doma zdravlja Breza, te da bira i imenuje članove Upravnog odbora u JU Dom zdravlja Breza, te ima obavezu pratiti rad i aktivnosti ove ustanove.

Vijećnik Avdić Edin zatražio je odgovor da li menadžment JU Dom zdravlja Breza vrši isplate otpremnina za bivše uposlenike , ne po redu odlaska u mirovinu nego proizvoljno kršeći ljudskoprava i odredbe Zakona o diskriminaciji.

Postavio je i pitanje da se dostavi pismena Informacija o svim javnim nabavkama koje su realizovane sredstvima poreskih obveznika iz Budžeta Općine Breza u periodu od početka 12. mjeseca 2016. do kraja 12. mjeseca 2017. godine sa sljedećim podacima:

- Naziv subjekta, datum realizacije, finansijskavrijednost sa svim aneksima i razlozima za koji su doneseni ikoliko ih je bilo.

Vijećnik Avdić pokrenuo je i sljedeće inicijative:

- Da jedna ulica u Brezi nosi ime ul. 304. Brdske brigade.
  - Da se proda građevinsko zemljište u industrijskim /poslovnim zonama ili određen broj parcela kojima će se graditi isključivo proizvodni, poslovni, poslovno - administrativni objekti sa ciljem zapošljavanja i proizvodnje.
  - Da se formira jedna urgentna komisija pri JP Komunalno d.o.o. Breza za procjenu stanja, koja će obići sva igrališta i provjeriti ispravnost i funkcionalnost dječijih i sportskih sprava i rekvizita za igru/sve što je pokvareno ili popraviti ili ukloniti.
  - Da se napravi kataster dječijih i sportskih igrališta.
  - Donijeti Odluku o uređenju i održavanju zelenih i sportskih rekreativnih površina, ko će upravljati tim površinama, ko će nadzirati te kontrolisati standarde opreme/sigurnost/ koja se na njima postavlja i ko će provjeravati ispravnos., kako bi se spriječile tragične posljedice.

(Radu vijeća priključio se vijećnikBajrić Fetah) 17,50 sati.

Vijećnik Arif Sirotanović postavio je vjećničko pitanje koje se odnosi na Zakon o igrama na sreću, da li su objekti igara na sreću udaljeni kako je propisano u zakonu od škola , obdaništa i vjerskih objekata.

Vijećnik Bajrić Fetah postavio je vjećničko pitanje zašto Općinski načelnik u svom radu ne poštuje Statut općine Breza i Poslovnik o radu Općinskog vijeća obzirom da nije dobio vijećnički odgovor na pitanje koje se odnosi napokretanje odgovornosti na negativan Revizorski izvještaj za 2016. godinu koji je postavljao i tražio više puta. Također traži od Sekretara općinskog vijeća i predsjedavajućeg vijeća da pismeno odgovore zašto u okviru svojih nadležnosti nisu pokrenuli aktivnost da se odgovor na postavljeno pitanje dostavi, te traži pismeni odgovor.

Predsjedavajući Općinskog vijeća pojasnio je da je na sjednici kolegija Općinskog vijeća 12 .12. 2017. godine donesen Zaključak kojim se nalaže Općinskom načelniku da vijeću dostavi Informacije po određenim pitanjima a između ostalog iaktivnosti pokrenute po pitanju odgovornosti za negativan Revizorski izvještaj općine Breza za 2016. godinu.

Predsjedavajući Općinskog vijeća također je vijećnicima predložio inicijativu po pitanju uvođenja savremenih tehnologija i komunikacija sa vijećnicima elektronskim putem.

Zatim se pristupilo utvrđivanju dnevnog reda.

Predsjedavajući Općinskog vijeća upoznao je vijećnike da su na adresu Općinskog vijeća pristigla 3 dopisa dostavljena od strane: Općinskog načelnika o razrješenju predsjednika UO JU Dom zdravlja Breza, predsjednika UO JU Dom zdravlja Breza Salčinović Fikreta, dopis dostavljen od člana UO Doma zdravlja Breza, Muratović Kenana i VD-direktorice Omerhodžić Amine te predložio je da se dnevni red sjednice proširi sa tačkom:

Razmatranje prijedloga za razrješenje predsjednika UO JU Dom zdravlja Breza.

Vijećnik Sirotanović Arif zatražio je da se dnevni red proširi sa tačkom razmatranje stanja i problematike FK Rudar u Brezi.

Predsjedavajući Općinskog vijeća pojasnio je da prijedlog nije došao od ovlaštenog predlagača te da nema nikakvog materijala za raspravu. Predlaže da se za jednu od narednih sjednica pripremi materijal i predloži tačka dnevnog reda.

Vijećnik Buljetović Ćamil u ime klubova vijećnika DF i SDP predlaže da se problematika i stanje u sportu, kao i jasni i precizni planovi i zadaci, odrednice za 2018. godinu pripreme i razmatraju na jednoj od narednih sjednica Općinskog vijeća.

Nakon datih prijedloga pristupilo se glasanju za proširenje dnevnog reda da se kao 11. tačka dnevnog reda razmatra razrješenje predsjednika UO JU Dom zdravlja Breza, te je konstatovano da je prijedlog usvojen sa 19.glasova ZA i 2 suzdržana glasa.

Nakon toga, predsjedavajući Općinskog vijeća dao je na glasanje prijedlog dnevnog reda sa datim izmjenama, te je jednoglasno sa 21 glas ZA usvojen sljedeći:

## **D N E V N I   R E D**

1. Aktivnosti Općinskog načelnika između dvije sjednice.
2. Razmatranje i usvajanje Izmjena i dopuna Budžeta Općine Breza za 2017. godinu.
3. Razmatranje i usvajanje prijedloga Budžeta Općine Breza za 2018. godinu.
4. Razmatranje i usvajanje prijedloga Odluke o izvršavanju Budžeta Općine Breza za 2018. godinu.
5. Razmatranje i usvajanje prijedloga Odluke o usvajanju izmjena i dopuna Regulacionog Plana Centar.
6. Razmatranje i usvajanje prijedloga Odluke o provođenju izmjena i dopuna Regulacionog Plana Centar.
7. Razmatranje Nacrta zaključka o davanju prethodne saglasnosti na dodjelu koncesija za istraživanje i eksploataciju mineralnog resursa uglja na području općine Breza.
8. Razmatranje i donošenje zaključka po Nacrtu Programa rada Općinskog vijeća za 2018. godinu.
9. Razmatranje i usvajanje Izvještaja o stanju protivpožarne zaštite na području općine Breza.
10. Imenovanje Komisije za vođenje aktivnosti po pitanju naknade za prevoz osiguranih lica predviđen Zakonom o zdravstvenom osiguranju FBiH.
11. Razrješenje predsjednika UO JU Dom zdravlja Breza.

**Ad.1**

Usmena informacija o radu Općinskog načelnika u periodu između dvije sjednice.

Općinski načelnik upozna je vijeće da su u periodu između dvije sjednice vođene aktivnosti na donošenju Izmjena i dopuna Budžeta općine Breza za 2017. godinu, kao i prijedlog Budžeta Općine Breza za 2018. godinu, kao i ostale aktivnosti vezane za normalno funkcionisanje općinskog organa Uprave. Zahvalio se svim saradnicima za korektnu saradnju i uputio je čestitke za nastupajuće praznike.

Vijećnik Avdić Edin zatražio je da općinski načelnik detaljnije upozna vijećnike o odrađenim poslovima.

Općinski načelnik upoznao je da je u proteklom periodu vodio aktivnosti po pitanju naplate koncesija sa nadležnim organima. Kada su u pitanju infrastrukturni projekti upoznao je vijećnike da su završeni projekti izgradnje vodovoda Dadijevac, asfaltiranje lokalnog puta u naselju Župča u okviru IFAD projekta. U završnoj fazi je i rekonstrukcija puta 444, a vrše se i radovi na putu Liješće. Vršeni su i radovi na sanaciji klizišta na Opreču, a vrše se i radovi na potoku Jasike II faza. Biće nastavljene i radovi na vodovodu Bukovik.

Vijećnica Selma Beširević upoznao je vijeće da su obezbijeđena sredstva za utopljanje škole u Župči i Obdaništa Umihana Čuvidina, a obezbijeđena su sredstva za sanaciju klizišta Kolonije, te se zahvalila svima koji su pomogli u obezbjeđivanju sredstava.

Predsjedavajući Općinskog vijeća upoznao je vijeće da je na sastanku predsjednika klubova parlamentarnih stranaka 12.12.2017. godine naloženo općinskim službama i općinskom načelniku da najkasnije do 15.1.2018. godine dostave informaciju o realizaciji usvojenih zaključaka nasljednicama Općinskog vijeća, da Općinski načelnik dostavi pismenu informaciju u kojoj fazi je donošenje Pravilnika o unutrašnjoj sistematizaciji radnih mjesta u Općini Breza.

Općinski načelnik informisao je vijeće da će Pravilnik o unutrašnjoj organizaciji svjetlost dana ugledati na početku 2018. godine. Također je upoznao vijećnike da će ubuduće informaciju o aktivnostima između dvije sjednice dostaviti u pismenoj formi.

Vijećnik Avdić Edin istakao je, da nas načelnik treba informisati šta je uradio a ne šta radi.

**Ad.2**

Razmatranje i usvajanje Izmjena i dopuna Budžeta Općine Breza za 2017. godinu.

Pomoćnik općinskog načelnika Meliha Beširević pojasnila je, da u skladu sa Zakonom o Budžetima- proračunima FBiH predviđeno je da, ukoliko dođe do određenih odstupanja u odnosu na predviđeni plan, može doći do predlaganja izmjena i dopuna Budžeta. U konkretnom slučaju kod prodaje gradskog građevinskog zemljišta došlo je do povećanja prihoda. Prvobitni prijedlog Budžeta za 2017. godinu bio je :

- PRIHODI 4.600.000KM,
- RASHODI 4.450.000KM,
- POKRIĆE AKUMULIRANOG DEFICITA 100.000KM
- TEKUĆA REZERVA 50.000KM.

U izmjenama i dopunama Budžeta općine Breza predlaže se

- PRIHODOVNA STRANA u iznosu od 5.321.500KM
- RASHODI 4.657.173 KM
- OBAVEZE PO DEFICITU 654.327 KM
- TEKUĆA REZERVA 10.000 KM

Također je pojasnila da je, kada je u pitanju rashodovna strana došlo do promjene u pogledu pristizanja obaveza iz prethodnih godina. Do povećanja rashoda došlo je i u stavci plate i naknade uposlenika organa Uprave obzirom da još uvijek nije došlo do racionalizacije radnih mjesta u općinskom organu Uprave, što je zadatak općinskog načelnika u narednom periodu.

Predsjednik kluba SDA Mirza Ahmedspahić u ime Kluba vijećnika SDA Breza, a na osnovu mišljenja Komisije koja je konstatovala da nije ispoštovana zakonska procedura donošenja Izmjena i dopuna Budžeta Općine Breza za 2017. godinu, te da se oglušilo i u vezi sa Zaključkom Općinskog vijeća vezanog za prijedlog donošenja Izmjena i dopuna Budžeta Općine Breza za 2017. godinu, Klub vijećnika SDA neće podržati ovaj prijedlog. Također, ne možemo podržati i činjenicu da su sredstva za plaće i naknade uposlenika prešle iznos od 32 %, što je materijalno značajan iznos u odnosu na ukupni Budžet, a na što smo kao Klub vijećnika upozoravali još od samog početka ove budžetske godine. Mišljenja smo da Općinsko vijeće kao kolektivni organ ne bi trebao preći preko činjenice da se nepoštuju zakonske odredbe i procedure donošenja izmjena i dopuna Budžeta za 2017.godinu.

Vijećnik Buljetović Čamil ispred kluba vijećnika DF i SDP istakao je da je prihodovna strana Izmjena i dopuna Budžeta Općine Breza za 2017. godinu onakva kakva jest. Dok rashodovnu stranu moramo pratiti i izvršavati onako kako je planirano. Ovim prijedlogom sport je stavljen na najniže mjesto, dok su u prvi plan došle plate i naknade uposlenika organa Uprave. Došlo je vrijeme da se traži odgovornost za neizvršenje Budžeta onakvog kako je planiran, zbog toga navedeni klubovi neće podržati prijedlog.

Vijećnik Sokić Dževahid na strani 6 gdje su prikazane naknade za rad političkih partija ukazao na tehničku grešku u pogledu visine naknade.

Vijećnik Bajrić Fetah u svom izlaganju istakao je, da podržava stav komisije za Budžet i finansije. Konstatovao je da je uporedo sa povećanjem prihoda automatski došlo do povećanja i rashoda, i sredstva su se ponovo trošila na stavke plate i naknade i isplata pojedincima, te ispada da se sredstva uzimaju od građana i troše nenamjenskim mjesto da iste usmjere za isplatu podsticaja za poljoprivredu kao i razvoju sporta.

Općinski načelnik Munib Zaimović istakao je da je dolaskom na funkciju zatekao velika dugovanja kako u pogledu isplate poljoprivrednog podsticaja, isplate zakonskih naknada prema korisnicima Centra za socijalni rad Breza tako i isplate ranije preuzetih obaveza te se u proteklom periodu bazirao na isplatu ovih potraživanja kako ne bi došlo do blokiranja. Mišljenja je da će planirane a neisplaćene obaveze prema poljoprivrednicima i drugim korisnicima Budžeta isplatiti onako kako je planirano.

Vijećnik Bajrić Fetah kategorički je tvrdio da je načelnik za devet mjeseci 2017.godine za podsticaj isplatio 1500KM od planiranih 50.000KM što je oko 2% planiranog, prave se uštede na stavkama čiji korisnici su direktno građani općine Breza, dok se na drugoj strani za rad savjetnika općinskog načelnika isplaćuje iz Budžeta općine Breza 80.000KM.

Vijećnica Beširević Selma u svom izlaganju istakla je da će provođenjem reorganizacije općinskog organa Uprave doći do povećanja zaposlenih, što u svakom slučaju nije naš cilj, te treba tražiti rješenja koja neće stvarati još veći broj nezaposlenih.

Vijećnik Kadrić Memsud istakao je da je on bio protiv Izvještaja o izvršenju Budžeta za 2016.godinu. Pozitivan je prijedlog za smanjenje deficita i iz tog razloga će glasati za ovu izmjenu i dopunu Budžeta općine Breza za 2017.godinu. Zadovoljan je radom općinskog načelnika po pitanju smanjenja ukupnog deficita općine Breza.

Vijećnik Avdić Edin istakao je da je prijedlog Izmjena i dopuna Budžeta Općine Breza za 2017. godinu nelogičan i apsurdan i da ne bi došlo do poremećaja u isplatama budžetskim korisnicima glasaće za ovaj prijedlog ali neće glasati za glavni dokument Izvještaj o izvršavanju Budžeta općine Breza za 2017.godinu koji se na dnevnom redu očekuje u martu

2018.godine. Da bi pratili postupak izvršenja Budžeta potreban nam je dokument Budžeta, pravovremene i tačne informacije kao i Budžetski kalendar. Već u junu mjesecu pokazale su se naznake da će doći do poremećaja u pogledu rashoda po pojedinim stavkama prvenstveno stavka plate i naknade koja će do kraja 2017. godine porasti za 380.000KM od planiranih. Kada se radi o manjim korekcijama Budžeta to se radi u hodu, a poremećaj u rashodima za predloženi period poprimio je veće razmjere. U pogledu vremenskom za izvršenje ovog prijedloga ostalo je do kraja godine još samo 5 dana što je nelogično. Također je uputio kritiku na način pregleda promjena koje su došle u Budžetu te je trebalo prikazati samo stavke kod kojih je došlo do promjene a ne i onih gdje nije došlo do promjene. Najviši poremećaj se vidi u stavkama plata i naknada te treba što prije izvršiti racionalizaciju organa uprave ali ne na način da stvaramo nezaposlene nego na osnovu standarda i normativa. Komunalne usluge smanjene su na 90.000KM a usluge za telefon i telefaks sa planiranih 6.500KM povećani su na 9.700KM. Stavke vijećničke naknade su ostale nepromijenjene. Došlo je do povećanja sredstava za reprezentaciju. Grantovi neprofitabilnim organizacijama su takođe smanjeni, dodaci za sport, dodatci boračkim populacijama, naknade klubovima vijećnika, naknade sportskim društvima boračkim populacijama, naknade boračkim udruženjima, te je došlo do je za reprezentaciju izdvojeno više novca nego za borcu. Subvencija javnim ustanovama također je smanjena. Smanjene su naknade za stipendije nadarenim učenicima, naknade za porodilje a ukinute su naknade za treće dijete te liječenje steriliteta. Nema subvencija za novosnovane firme, smanjen je poticaj za poljoprivredu. Došlo je do povećanja kreditnih obaveza za vodosnadbijevanje koje su sa 80.000KM povećane na 213.000KM, kako je do toga došlo. Traži odgovornost da svaki pomoćnik iz svoje nadležnosti pojasni zašto i kako je došlo do promjena. Također predlaže da se promijeni Statut io radu O.V. gdje će se predvidjeti da pomoćnici Općinskog načelnika budu reizborna radna mjesta te da prema radu budu imenovani ili smijenjeni. Apsurdno je da je i pored povećanja prihoda došlo do smanjenja stavki za pojedine budžetske korisnike i to na iznos koji je planiran Budžetom umjesto da dođe do povećanja istih, te samim tim smatra da se Općinsko vijeće obmanjeno i podcjenjeno.

Učesnika u raspravi više nije bilo, te je predsjedavajući Općinskog vijeća dao na glasanje prijedlog Izmjena i dopuna Budžeta Općine Breza za 2017. godinu, te je nakon provedenog postupka glasanja konstatovano da je prijedlog usvojen sa 14 glasova ZA, 4 SUZDRŽANA i 3 glasa PROTIV.

### Ad.3

Razmatranje i usvajanje prijedloga Budžeta Općine Breza za 2018. godinu.

Pomoćnik Općinskog načelnika Meliha Beširević upozнала je vijećnike da je Nacrt Budžeta općine Breza za 2018.godinu usklađen sa dokumentom okvirnog Budžeta 2018.-2020.godine FBiH, ZDK i Općine Breza. U nacrtu Budžeta općine Breza, prioritet Općinskog načelnika će biti sanacija i konsolidacija Budžeta općine Breza, smanjenje ukupnog deficita Budžeta, efikasno i eficientno dalje korištenje budžetskih sredstava i raspolaganje javnim prihodima, čime bi se uspostavila budžetskaravnoteža, omogućilo daljnje investiranje, rast i razvoj i privlačenje investitora kako domaćih tako i inostranih a sve u cilju stvaranja novih radnih mjesta i upošljavanje lokalnog stanovništva i prosperitet lokalne zajednice.

Prijedlog Budžeta općine Breza za 2018.godinu sastoji se od:

- PRIHODI 5.460.000 KM,
- RASHODI 5.260.000 KM,
- OBAVEZE PO DEFICITU 150.000KM
- TEKUĆA REZERVA 50.000KM

Upoznala je vijećnike da je provedena javna rasprava po Nacrtu Budžeta općine Brezaza 2018. godinu a pribavljeno je i mišljenje Komisije za Budžet i finansije.

Vijećnik Salčinović Fikret uputio je čestitke općinskom načelniku na pripremama Budžeta Općine za 2018.godinu i provedenu javnu raspravu, gdje su svi mogli davati primjedbe i sugestije. Predloženi Budžet je stabilizirajući, uravnotežen i blagim dijelom razvojni. Ubuduće obratiti pažnju na povećanje prihodovne strane od strane predlagača, te pokazati veći nivo odgovornosti.

Predsjednik kluba SDA Mirza Ahmedspahić istakao je, da prijedloge i sugestije koje je dao ovaj klub nisu prihvaćeni a odnosili su se da se jasnije rasčlane i jasnije definišupojedine stavke Budžeta, da se preciziraju troškovi i kreiraju za svaku službu posebno. Bilo je predloženo da se uz prijedlog Budžeta za 2018. godinu izradi i priloži *Program kapitalnih projekata* za tretiranu budžetsku godinu. To bi podrazumijevalo plan aktivnosti i infrastrukturnih radova u okviru jedne budžetske godine, sa preciziranim iznosima i dinamikom izvođenja istih.

Kada bi se uvažili prethodni prijedlozi tekstualni dio nebi bio potreban a tabelarni dio Budžet općine Breza treba da je prilagođen i transparentan svim građanima općine Breza. Iz navedenih razloga ovaj klub neće podržati Budžet općine Breza.

Vijećnik Avdić Edin postavio je pitanje na osnovu čega je na kontu 730000- tekuće potpore (grantovi) planiran u iznosu 1.000.000 KM. Zašto je na kontu 811000- Kapitalni primici ponovo planiran iznos od 200.000KM iako je u prošloj godini ta ista stavka izvršena sa 21.000KM, te upozorava da se takvim planiranjem krši zakon.

Vijećnik Bajrić Fetah istakao je da su sredstva za palate i naknade ponovo planirana u procentu koji prelazi normalnu vrijednost izdvajanja iz Budžeta te je potrebno izvršiti racionalizaciju plata i broj uposlenih svesti na odgovarajući broj. U Budžetu za 2018.godinu nisu predviđena sredstva za gradsko groblje kao i za završetak centralnog šehidskog spomen-obilježja. Smatra iznos za poljoprivredni podsticaj treba povećati. Sramotno je da uposlenici Centra za socijalni rad Breza troše više sredstava nego sami korisnici Centra zbog kojih on i postoji. Doznačeno je 330 hilja KM Ccentra, predlaže da to bude obrnuto. Također je istakao da vijećnici i građani imaju pravo da iznose svoje prijedloge i mišljenja i da komentarišu o nacrtu Budžeta.

Općinski načelnik pojasnio je da je u ovoj budžetskoj godini predviđen poljoprivredni podsticaj u iznosu od 70.000 KM. Također je istakao da sredstva za izgradnju Centralnog šehidskog obilježja nisu planirana ali kad se riješe imovinsko-pravni odnosi, i kad se steknu uslovi za nastavak izgradnje, novčana sredstva neće biti problem. Kada je u pitanju Centar za socijalni rad, istakao je da će i u toj javnoj ustanovi doći do racionalizacije radnih mjesta, te će se nastojati da se obezbijedi normalna isplata sredstava socijalno ugroženim kategorijama kako je to i planirano zakonom.

Vijećnik Buljetović Ćamil istakao je da je Budžet nerealno planiran te se oslanja na Prostorni plan općine Breza, čijim usvajanjem bi se stekli uslovi za izgradnju resort naselja a samim tim i punjenjem Budžeta naplatom naknada predviđenih zakonom. Ukoliko ne dođe do usvajanja Prostornog plana doći će i do problemu punjenju Budžeta. Stranka DF i SDP su protiv ovog nacrta. Drugi razlog za nepodržavnje Budžeta je rashodovna strana što nije došlo ni do minimalnog povećanja sredstava za finansiranje udruženja. Treći razlog je što niti jedan prijedlog ni sugestija upućen od strane DF-a i SDP-a nisu uvaženi te zbog toga neće podržati ovaj prijedlog.

Općinski načelnik kategorički tvrdi da prijedlog Budžeta nije uslovljen usvajanjem Prostornog plana, iako bi se usvajanjem istog pružila mogućnost za razvoj i dovođenje novih investicija a kada se isti usvoji prihodi u Budžetu će se povećati.

Vijećnik Avdić Edin istakao je da je nelogično da i pored povećanja prihoda ne dolazi do isplate budžetskim korisnicima onako kako je Općinsko vijeće usvojilo.

Vijećnik Sirotanović Arif istakao je da u sadašnjoj situaciji moramo biti jedinstveni, da radimo po zakonu da nastojimo da vratimo dugove i da riješimo nagomilovane probleme. Stvarati uslove za unapređenje sporta i stvarati ambijent za bolji život građana općine Breza, a to možemo samo ako smo jedinstveni i ako imamo isti cilj.

Učesnika u raspravi više nije bilo pa je predsjedavajući Općinskog vijeća dao na glasanje prijedlog Budžeta Općine Breza za 2018. godinu, te je nakon provedenog postupka glasanja konstatovano da je isti usvojen sa 14 glasova ZA, 5 suzdržanih i 2 glasa protiv.

#### **Ad.4**

Razmatranje i usvajanje prijedloga Odluke o izvršavanju Budžeta Općine Breza za 2018. godinu.

Učesnika u raspravi nije bilo pa je predsjedavajući Općinskog vijeća dao na glasanje Odluke o izvršavanju Budžeta Općine Breza za 2018. godinu, nakon provedenog postupka glasanja konstatovano da je ista usvojena sa 14 glasova ZA, 5 suzdržanih glasova i 2 glasa protiv.

#### **Ad.5**

Razmatranje i usvajanje prijedloga Odluke o usvajanju izmjena i dopuna Regulacionog Plana Centar.

Predstavnik IPS-a instituta Mešić Jasmin pojasnio je da je Prijedlog planskog dokumenta utvrđuje se na osnovu nacrtu koji je uspješno prošao fazu javnog uvida i rasprave i na osnovu stava nosioca pripreme o primjedbama, sugestijama i mišljenjima na taj nacrt. U prijedlogu planskog dokumenta ne mogu se mijenjati planska rješenja iz nacrtu plana, osim onih na koji je bila stavljena osnovana i prihvaćena primjedba, sugestija ili mišljenje. Po održanoj javnoj raspravi predviđenoj ovim zakonom, nosilac izrade završava prijedlog planskog dokumenta i uz odgovarajuće obrazloženje dostavlja ga nosiocu pripreme.

Po održanoj stručnoj raspravi nosioca pripreme i savjeta plana, nosilac pripreme zauzima stav u pogledu dostavljenih primjedbi, sugestija i mišljenja, sa obrazloženjem i razlozima zbog kojih pojedine primjedbe, sugestije i mišljenja nisu prihvaćene, i dostavlja ga nosiocu izrade.

Vijećnik Bajrić Fetah je na javnoj raspravi po nacrtu izmjena i dopuna Regulacionog plana centar dao primjedbu o izmještanju objekta „Strojni“ iz centra grada i planiranje konačne namjene prostora u tom dijelu RP. Stav nosioca plana je da se planira rušenje hale na zapadnom dijelu pogona, a halu do zanatskog centra redizajnirati i dati joj namjenu centraliteta: galerijske prostore, dvorane za školepleasa,sviranja na muzičkim instrumentima, kamernе predstave i ostale kulturne sadržaje, dok ostatak parcele planirati kao otvorenu javnu površinu, gradski trg.

Vijećnik Arif Sirotanović predlaže amandmanda se privremeni objekat kod objekta Ekmasan zadrži u prostoru i planira kao stalni objekat, da se planiraza izgradnju objekta koji je primjeren tom okruženju.

Pomoćnik Općinskog načelnika Smajila Omerhodžić pojasnila je da jeurađen projekat uređenja Trga rudara, te su 2 privremena objekta u tom dijelu predviđena da se uklone.

Vijećnik Ćamil Buljetović podržava amandman vijećnika Sirotanović Arifa da se privremeni objekti ostave u prostoru, te da se po potrebi zatraži saglasnost IZ Breza obzirom da se objekat nalazi u blizini vjerskog objekta.

Gđa Smajila Omerhodić pojasnila je da ukoliko bi se ova dva objekta i ostavila u prostoru provodi se licitacija i objekat dobiva onaj ko ponudi najveću cijenu, tako da ne znači da će dosadašnji korisnici ove objekte i dalje koristiti.



Bajrić Fetah istakao je da, Regulatorni plan i projekat uređenja trga Rudara, (objekti predviđeni za uklanjanje), podržava obzirom da se nalazi u blizini vjerskog objekta i u budućnosti može doći do korištenja objekta za sardžaje koji nisu primjereni.

Vijećnik Sokić Dževahid istakao je da pošto se radi o privremenim objektima koji su predviđeni za uklanjanje to treba i podržati i biti oprezan .

Predstavnik IPS-a instituta također predlaže da se objekti tretiraju onako kako je predviđeno planom te da se radi o privremenim objektima koji se ne uklapaju u projekat uređenja trga rudara.

Predsjedavajući Općinskog vijeća dao je na glasanje prijedlog amandmana koji je predložio vijećnik Arif Sirotanović da se privremeni objekti koji senalaze kod objekta „Ekmasan“ zadrže u prostoru.

Nakon provedenog postupka glasanja konstatovano je da prijedlog nije dobio potrebnu većinu glasova (9 vijećnika je glasalo ZA prijedlog amandman).

Nakon toga pristupilo se glasanju za Odluke o usvajanju izmjena i dopuna Regulatornog Plana Centar, te je nakon glasanja konstatovano da je isti usvojen jednoglasno sa 21 glas ZA, bez protiv i suzdržanih glasova.

#### **Ad.6**

Razmatranje i usvajanje prijedloga Odluke o provođenju izmjena i dopuna Regulatornog Plana Centar.

Pomoćnik Općinskog načelnika Smajila Omerhodžić pojasnila je da se ovom Odlukom utvrđuju uslovi korištenja, izgradnje, uređenja i zaštite prostora i način provođenja izmjena i dopuna Regulatornog plana „Centar“ Breza, a naročito granice prostorne cjeline, urbanističko – tehnički uslovi za izgradnju građevina, uslovi za uređenje građevinskog zemljišta, uređenje zelenih i slobodnih površina, te odnosi prema postojećim objektima. Izgradnja unutar obuhvata Plana vršiti će se prema odredbama Plana.

Nakon pojašnjenja bez učesnika u raspravi jednoglasno sa 21 glas ZA , bez protiv i suzdržanih glasova, usvojena Odluka o provođenju izmjena i dopuna Regulatornog Plana Centar.

Potom je uslijedila je pauza od 19:45-20:10 h

#### **Ad.7**

Razmatranje Nacrta zaključka o davanju prethodne saglasnosti na dodjelu koncesija za istraživanje i eksploataciju mineralnog resursa uglja na području općine Breza.

Uvodne napomene povodom predlaganja zaključka dao je pomoćnik Općinskog načelnika Salih Hasanspahić koji je pojasnio da se JP Elektroprivreda d.d. Sarajevo ZD RMU Breza d.o.o. Breza obratili sa zahtjevom za dodjelu koncesija za istraživanje i eksploataciju mineralne sirovine uglja na području općine Breza. Kako se radi o veoma kompleksnom postupku dodjele koncesije na istraživanje i eksploataciju potrebna je saglasnost Općinskog vijeća Breza kao osnovni akt za dalju aktivnost za realizaciju koncesionog projekta. Kod pripreme davanja saglasnosti Općinskog vijeća potrebno je pažnju obratiti na više različitih aspekata koji su potrebni za davanje ove saglasnosti. Stoga se predlaže Općinskom vijeću da usvoji predloženi zaključak.

Nakon datog pojašnjenja jednoglasno sa 18 glasova ZA, bez protiv i suzdržanih glasova usvojen je Nacrt zaključka o davanju prethodne saglasnosti na dodjelu koncesija za istraživanje i eksploataciju mineralnog resursa uglja na području općine Breza. (U trenutku glasanja u Sali nisu bila prisutna 2 vijećnika Bulbulušić Nejira i Zaimović Anes).

#### **Ad.8**

Razmatranje i donošenje zaključka po Nacrt Programa rada Općinskog vijeća za 2018. godinu.

Predsjedavajući Općinskog vijeća je u kratkim crtama pojasnio postupak donošenja Programa rada Općinskog vijeća za narednu godinu.

Učesnika u raspravi nije bilo, te je nakon provedenog postupka glasanja konstatovano da je jednoglasno sa 19 glasova ZA, bez protiv i suzdržanih glasova usvojen zaključak po Nacrt Programa rada Općinskog vijeća za 2018. godinu.

#### **Ad.9**

Razmatranje i usvajanje Izvještaja o stanju protivpožarne zaštite na području općine Breza.

Pomoćnik Općinskog načelnika, Herco Huso iznio je osnovne pokazatelje o stanju protivpožarne zaštite na području općine Breza, te dao pravni osnov djelovanje iz oblasti protivpožarne zaštite. Dao je prijedlog daljih mjera za djelovanje. U skladu sa zakonskim odredbama, požare na području Općine Breza gasi vatrogasna jedinica pri ZD RMU Breza a od ove godine i Dobrovoljno vatrogasno društvo Breza. Opremljenost vatrogasne jedinice ZD RMU Breza je i dalje ostala slaba i raspolaže sa samo jednim vozilom-cisternom starosti 30 godina. Kada je u pitanju ljudski resursi raspolaže sa dovoljnim brojem vatrogasaca (18).

Dobrovoljno vatrogasno društvo Breza, je novoformirano društvo i ubrzano se radi na opremanju istog, te na obezbjeđivanju vatrogasne cisterne. U toku je i nabavka vatrogasne cisterne sa opremom, to je donacija kantonalne uprave civilne zaštite iz Zenice. Značajnu pomoć u protivpožarnoj zaštiti pružilo je i JP Komunalno d.o.o. - koja raspolaže sa cisternom sa vodom.

Vijećnik Bajrić Fetah istakao je da Dobrovoljno vatrogasno društvo treba da bude opremljeno materijalno tehničkim sredstvima i obučenim vatrogascima te u radu odrediti prioritete.

Općinski načelnik istakao je da je u vrlo kratkom vremenu došlo do znatnih pomaka u obezbjeđenju materijalno - tehničkih sredstava za Dobrovoljno vatrogasno društvo Breza imajući u vidu činjenicu na propisane standarde i normative koje mora zadovoljiti dobrovoljno vatrogasno društvo.

Vijećnik Bašić Mirnes postavio je pitanje da li postoji saradnja sa Šumarstvom Vareš, te koliko će starost vozila uticati na rad vatrogasnog društva.

Pomoćnik Općinskog načelnika za poslove CZ istakao je da je saradnja sa Šumarstvom veoma dobra, te da su vozila koja su nabavljena za potrebe CZ u veoma dobrom stanju te mogu zadovoljiti trenutne potrebe.

Učesnika u raspravi više nije bilo te je nakon provedenog postupka glasanja konstatovano da je Izvještaj o stanju protivpožarne zaštite na području općine Breza usvojen jednoglasno sa 19 glasova ZA, bez protiv i suzdržanih glasova.

#### **Ad.10**

Imenovanje Komisije za vođenje aktivnosti po pitanju naknade za prevoz osiguranih lica predviđen Zakonom o zdravstvenom osiguranju FBiH.

Vijećnik Avdić Edin predlaže da umjesto prijedloga pod rednim brojem 6, Član Dženana da se imenuje Mustafić Eldin.

(Radu vijeća su se priključili vijećnici Bulbulušić Nejira i Zaimović Anes u 20:25 h)

Vijećnik Bajrić Fetah nije za prijedlog da se predloženi članovi brišu te da komisija može imati i više članova.

Vijećnik Avdić Edin predlaže da se za sekretara komisije imenuje Mustafić Eldin a da on ne bude član komisije, ali će u radu komisije dati dvoji doprinos.

Nakon toga pristupilo se glasanju:

U Komisiju za vođenje aktivnosti po pitanju naknade za prevoz osiguranih lica predviđen Zakonom o zdravstvenom osiguranju FBiH, imenuju se:

1. Mustafić Eldin, predsjednik komisije
2. Kadrić Memsud, član
3. Ahmedspahić Mirza, član
4. Salčinović Fikret, član
5. Beširević Midhat, član
6. Čolan Dženan, član

Zadatak Komisije je da sa Zavodom zdravstvenog osiguranja ZDK izvidi mogućnost donošenja podzakonskih akata kako bi osigurana lica imala novčanu naknadu za prevoz shodno Zakonu o zdravstvenom osiguranju FBiH („Sl. Novine FBiH“ broj: 30/97).

Nakon provedenog postupka glasanja konstatovano je da je prijedlog usvojen jednoglasno sa 21 glas ZA, bez protiv i suzdržanih glasova.

#### **Ad 11.**

Razrješenje predsjednika UO JU Dom zdravlja Breza.

Predsjedavajući Općinskog vijeća upoznao je vijećnike da je dana 26.12.2017.godine na adresu Općinskog vijeća stigao Prijedlog za razrješenje dužnosti predsjednika UO JU Dom zdravlja „Breza“ od strane Općinskog načelnika Muniba Zaimovića, zajedno sa ostavkom koju je podnio predsjednik UO JU Dom zdravlja Breza Fikret Salčinović, iz razloga što je 21.12.2017.godine imenovan za v.d. direktora Doma zdravlja Breza odnosno do provođenja konkursne procedure za konačno imenovanje direktora Doma zdravlja Breza a najduže do 6 mjeseci. Općinsko vijeće po zakonu imenuje i razrješava članove upravnih odbora čiji je osnivač općina.

Općinski načelnik upoznao je vijećnike da je člana UO JU Dom zdravlja Breza, Muratović Kenan zatražio hitno održavanje Vanredne sjednice UO Doma zdravlja Breza jednom tačkom dnevnog reda Poništenje Javnog oglasa za izbor i imenovanje direktora ustanove broj 01-694/2017 od 28.11.2017. godine.

Predsjedavajući Općinskog vijeća pročitao je Informaciju kojusu na adresu Općinskog vijeća dana 27.12.2017. godine dostavili član upravnog odbora Muratović Kenan i v.d. direktorice Omerhodžić Amina, vezana za imenovanje v.d. direktora JU Dom zdravlja Breza i donošenje zaključka po dostavljenoj informaciji.

Safet Zahirović je dao pojašnjenje po pitanju procedure za razrješenje predsjednika UO Doma zdravlja Breza, da je od ovlaštenog predlagача zaprimljen Prijedlog za razrješenje dužnosti predsjednika UO Doma zdravlja Breza. Uz prijedlog je dostavljena i ostavka predsjednika UO Salčinović Fikreta, te je shodno naprijed navedenom Općinsko vijeće nadležno da donese rješenje o razrješenju istog.

Učešće u raspravi uzeli su vijećnici Bajrić Fetah i Sirotanović Arif koji su zatražili da se ispoštuje zakonska procedura kod razrješenja predsjednika UO Doma zdravlja Breza.

Općinski pravobranilac Dženana Telalović sugerisala je da se obezbijedi i mišljenje ostalih članova UO Doma zdravlja Breza.

Vijećnik Avdić Edin predlaže da se zakaže sjednica kolegija OV a po potrebi i sjednica Općinskog vijeća na kojoj će se razmatrati ova problematika.

Vijećnik Fikret Salčinović inače predsjednik UO Doma zdravlja Breza istakao je da je 22.12.2017. godine podnio neopozivu ostavku na funkciju predsjednika Upravnog odbora JU Dom zdravlja Breza ,na lični zahtjev, obzirom da je Odlukom UP JU Dom zdravlja Breza dana 21.12.2017. godine imenovan za vršioca dužnosti direktora na period do provođenja konkursne procedure.

Uslijedila je pauza radi zauzimanja zajedničkog stava kluba vijećnika.

Nakon pauze predsjedavajući općinskog vijeća predložio je sljedeći:

## ZAKLJUČAK

### I

**DA SE** u što kraćem roku sazove kolegij Općinskog vijeća na kojem će se razmatrati problematika, razrješenja i imenovanja vršioca dužnosti direktora Javne ustanove Dom zdravlja Breza.

### II

Na sastanak predsjednika klubova pozvati ministra zdravlja ZDK, i članove Upravnog odbora JU Doma zdravlja Breza.

### III

Do sastanka obezbijediti potrebnu dokumentaciju, fotokopiju Zapisnika o radu Upravnog odbora koji se odnosi na razrješenje i imenovanje vršioca dužnosti direktora Doma zdravlja Breza.

Nakon provedenog postupka glasanja konstatovano je da je zaključak usvojen jednoglasno sa 21 glas ZA , bez protiv i suzdržanih glasova.

Ovim je iscrpljen dnevni red trinaesteredovne sjednice Općinskog vijeća Breza, koja je sa radom završila u 21.50 minuta.

*Sastavni dio ovog zapisnika čini i tonski zapis sjednice.*

ZAPISNIK SAČINILA  
Zakira Smailbegović  
Jusić Vedad

Općinskog vijeća

PREDSJEDAVAJUĆI